

օգտագործել միայն դուտ տեղական ծագում ունեցող բնիկ տարրերին վերաբերող նյութերը, նշելով հարկ եղած դեպքերում, թե ինչպես տեղում ձևավորված կենցաղային առանձնահատկությունն անդրադարձել է նոր հաստատված բնակչության նիստ ու կացի մեջ:

## ՋԱՆԳԵԶՈՒՐԸ ՎԱՐՉՍԿԱՆ ՏԵՍԱԿԵՏՈՎ

Սովորաբար անդրկովկասյան և մասնավորապես հայկական հասարակության լայն խավերի մեջ Ջանգեզուր է կոչվում Հայկական ՍՍՀ-ի այն հարավ-արևելյան մասը, որը Մեղրու վարչական շրջանի հետ տեղադրված է Ջանգեզուր (Ալանգյաղ) և Ղարաբաղի լեռնաշղթաների միջև, որոնցից առաջինը կազմում է Փոքր Կովկասի ներքին՝ արևմտյան և երկրորդը՝ նրա արտաքին՝ արևելյան լեռնաշխարհի վերջին հատվածը<sup>1</sup>: Այդ եզրավորող լեռնաշղթաները հանգուցվելով Միխթեփեն լեռների միջոցով Սաոցալի (Սառլալի) գագաթի մոտ՝ հետզհետե իրարից լայն հեռանում և հատվում են Արաքսի ջրերի ափին: Նրանց շարունակությունն Իրանի պետական սահմաններում հանդիսանում է Սևբարի (Ղարաղաղի) լեռնաշղթան, որն իր աղեղով կապում է այդ երկու լեռնաշխարհների ծայրերը և այդպիսով փակում է նրանց միջև պարփակված եռանկյունի տարածությունը հարավից: Եռանկյունու հյուսիսային անկյունը լցնում է Ղարաբաղի հրաբխային բարձրավանդակը, իր 2500 մ միջին բարձրությամբ, ամենաբարձրադիրն Անդրկովկասում, որից գահավիժող Նրոտան (Բաղարչայ) և Հագարու գետերը նախ ակոսում են Եռաբլրի (Ուլթափալարի) տեղի սարահարթը (1 200—1 500 մ) և ապա վազելով արագ ցածրացող մակերեսով թափվում են Արաքսի մեջ 400 մ բարձրության վրա: Ջանգեզուրի (Ալանգյաղի) լեռնաշղթայից դեպի արևելք հեռացող երկու լեռնաբազուկները Բարգուշատի (Բերգուշետի) և Մեղրու (Արեգունու-Մեղրու-Գյունեի կամ Չավնդուրի) եռանկյունին բաժանում են առանձին գավառների: Մեղրու (Արեգունու) լեռնաբազուկն առանձնացնում է մինչև Արաքսի հունը Մեղրու վարչական շրջանը: Այս լեռնաբազուկից դեպի հյուսիս ձգվող տարածությունն է, որ ցարական իշխանության օրով հայտնի է Ջանգեզուր ընդհանուր անվան տակ, թեև տեղացիք նրա առանձին բնամասերի համար ունեին հատուկ անուններ, այն է՝ Բարգուշատի լեռնաբազուկից հարավ և արևելք գտնվող մասի համար՝ Կապան, իսկ դեպի հյուսիս ձգվող հատվածի համար՝ Սիսիան և Բուն Ջանգեզուր անունները:

Տեղացիք հնում Ջանգեզուր անունը տալիս էին հատկապես միայն այն շրջանին, որը ներկա վարչական բաժանմամբ կոչվում է Գորիսի շրջան և ոռոգվում է Որոտան (Բաղարչայ) գետի միջին հոսանքով, այն մասով, որտեղ գետը «Որոտան գետի» անունն է կրում, ընդունելով իր մեջ Գորիսի շրջանի Խընձորեսկի և Կյորու (Չորաշենի) օժանդակ վտակները: Գավառակն ընդգրկում էր Եռաբլրի (Ուլթափալարի) սարահարթի արևելյան կեսը, սկսած Հալիձոր գյուղի հողերից մինչև Գորիսի գետահովիտը և տարածվում էր այս գետահովտից արևելք՝ Տեղ գյուղի ամբողջ սարահարթով: Ռուսական տիրապետության հաստատվելուց առաջ այդ գավառակը հարևան Սիսիանի, Կապանի և Մեղրու գավառների հետ մի մասն էր կազմում Ղարաբաղի խանության: 1813 թ. Գյու-

<sup>1</sup> Տե՛ս Լիսիցյան Սա., ՀեՍՀ-ի ֆիզիկական աշխարհագրություն, Երևան, 1940, էջ 54: